


7. ÞING KENNARASAMBANDS ÍSLANDS

10.-13. apríl 2018



SAMÞYKKT UM UNGLIÐASTARF KÍ

Sjöunda þing KÍ haldið 10. - 13. apríl 2018 beinir því til stjórnar KÍ að efla ungliðastarf í samstarfi við skólamálaráð, fræðslunefnd og aðra viðeigandi aðila á vettvangi KÍ. Á ársfundum KÍ verði gerð grein fyrir framgangi starfsins, verkfærum og áætlunum.

Þingið bendir á að ungliðastarf snýst um framtíðina og unga fólkið, verðandi kennara og unga kennara í starfi.

Árið 2015 samþykkti heimsþing Alþjóðasamtaka kennara stefnu um stuðning við nýliða og aukna þátttöku þeirra í félagsstarfi á vettvangi alþjóðasamtakanna og aðildarfélaga þeirra. Löng hefð er fyrir tengslum og starfi kennarafélaga á hinum Norðurlöndunum með kennaranemum að sameiginlegum hagsmunamálum og að því að veita ungum kennurum stuðning og auka virkni þeirra í starfi félaganna.

Þingið telur það vera ótvíræða hagsmuni KÍ til framtíðar að treysta sem best tengsl og samstarf við kennaranema um sameiginleg hagsmunamál sem varða kennaranámið og kennarastarfið, veita nemum tækifæri til að kynnast starfi KÍ og bjóða þeim upp á fræðslu, styðja við unga kennara til sporna gegn brotthvarfi úr starfi og efla þátttöku þeirra í félagsstarfi á vettvangi KÍ.

Þingið minnir á að starfsaðstæður ungra kennara eru flóknari en þeirra sem lengri reynslu hafa. Þarfir og aðstæður ungra kennara þurfa að vera ofarlega í starfi KÍ til að styrkja kennarastarfið og gera það eftirsóknarvert.

KÍ veiti ungum kennurum stuðning og efli þátttöku þeirra í félagsstarfi með því að skipuleggja fræðslu fyrir unga kennara og vettvang til að hittast, deila reynslu og mynda tengsl bæði innan aðildarfélaga og þvert á aðildarfélög.

KÍ vinni að því í samstarfi við stjórnvöld að tryggja ungum kennurum stuðning í starfi fyrstu árin með formlegri leiðsögn, handleiðslu og markvissri starfsþróun til að vinna gegn brotthvarfi úr starfi.